

# Қаламгерге құрмет

Ұлттық руханияттың өркендеуіне аса зор үлес қосқан, Қазақстанның құрметті журналисі, белгілі қаламгер, Екібастұз қаласының құрметті азаматы, «Отарқа» газетінің негізін салушы Аманкелді Қаңтарбайұлы дүниеден озғалы аттай желіп бір жыл ете шықты. Артында қалған жұрты ардақты азаматын қайтадан өгіле еске алды.

**Бектұрған ЛАҚАДЫЛ**

Алдымен көпшілік қаладағы қаламгер тұрған Киев көшесі, 11-үйдің қабырғасына орнатылған мемориалды тақтаның ашылу салтанатына жиналды. Оған қала әкімі А.Вербняк және марқұмның замандастары, әріптестері қатысты.

Қала әкімінің орынбасары Айгүл Марданова, ҚР мәдениет қайраткері Ғалия Балтабай, баянауылдық ардагер ұстаз, белгілі қаламгер Зе-

кебай Солтанбайұлы, марқұмның жолдасы Қайыр Қаниұлы және қаламы жүйрік танымал журналист, ақын Сайлау Байбосын сөз сөйлеп, Аманкелді Қаңтарбайұлының азаматтығы мен қайраткерлігі, қоғам алдында тындырған ізгілікті істері жайында естеліктер айтты.

-Аманкелді Қаңтарбайұлы Екібастұзда Абай атындағы қазақ орта

мектебінің сақталып қалуына, №18 орыс мектебінің мемлекеттік тілдегі білім беретін мектепке айналуына, тіл мен діл, дініміздің өркен жаюына айрықша еңбек сіңірген азамат еді. Сондықтан оның есімі қаланың бір көшесіне берілуін сұраймыз, -деді Ғалия Балтабай.

(Жалғасы 2-бетте)  
Сурет В.Фадеевтікі





## Қаламгерге күрмет

(Соңы. Басы 1-бетте)

Журналист Сайлау Байбосын қадірлі азаматтың ел мүддесі үшін атқарған қадау-қадау игі ісін айта келіп, енді артында қалған жоқтаушы жұртының не істеуі керектігі жайлы ұсыныс тастады.

- Бүгін біз «Жақсының аты өлмейді, ғалымның хаты өлмейді» деген қазақ даналығына тағы бір көз жеткізгендей болдық. Өзінің саналы ғұмырын осы өңірдің журналистика саласын өркендетуге арнап, ана тіліміздің жанашыры болған ағамыздың тұрған үйінің іргесіне естелік тақта орнаттық. Халық арасында «екінші өмірі басталды» деген сөз бар. Мұндай сөз әдетте әдебиет, өнер саласында жемісті еңбек еткен адамдарға арналып жатады. Міне, бүгін Аманкелді ағамыздың да екінші өмірі басталды десек, артық айтқандық болмас. Олай дейтініміз, осы көшеден өткен қалың жүргінші мына орнатылған естелік тақтаға көз салып, кімнің есімі жазылып тұрғанына қарап қызығушылық танытатыны белгілі. Әбекеңе арналған шаралар осымен тоқтап қалмай, алдағы уақытта да жалғасын таба берсе деймін. Айтпақшы, «Отарқа» газетінің журналистері мен марқұмның ұрпақтары ұйытқы болып жас журналистердің байқауын жариялады. Бұл да құптарлық іс,-деді С. Байбосын.

Тақтаны салтанатты ашу рәсімінен кейін жұртшылық «Үміт» кафесіне жиналды. Онда марқұмның рухына дұға оқылып, ас берілді. Сонымен бірге қарымды қаламгердің өмірі мен журналистік қызметі, шығармашылығы туралы түсірілген деректі фильм көрсетілді.